



## Giusep Widera-Sgier, Sedrun

14-08-1939 - 20-09-2003

Giusep Widera ei naschius ils 14 d'uost 1939 a Holderfelde en Tiaratudestga. Gia baul en sia affonza ha el cun sia famiglia e ses sis fargliuns stuiu sentir las sgarscheivlas consequenzas dalla secunda uiara mundiala. Mai ha il Sep Widera, sco el vegneva numnaus cheu a Sedrun, raquintau bia da quei grev temps e priu bein enqual misteri en fosso. Il temps dalla scola usitada ha el passentau a Niederraunau.

Baul en sia veta ha la tecnica e principalmein ils autos fascinau il Sep. Cun perseveranza ha el saviu realisar siu siemi da buob e serrar giu cun success igl emprendissadi sco mecanist d'autos igl onn 1957. A Heidenheim seperfecziunescha el vinavon sin siu mistregn duront dus onns. Quei fatg arva entginas portas egl exteriur sco specialist sin la marca d'auto VW. Il Sep nezegia la caschun e setschenta sin intermediaziun da siu schef a Mustér. In grond e grev pass per il giuven da 20 onns. Da s'integrar e sevolver haveva el stuiu emprender gia d'affon, quei ei stau in grond agid pil Sep. En nova patria, gie lu aunc romontscha, ha il giuven mat era empriu da guder la veta. Siu caracter curteseivel e plein humor han ils indigens acceptau immediat. Gie la cuida dall'elecziun sco bandierel dalla giuventetgna da Mustér ei stau pil Sep da lezzas uras ina honur tut speciala. Duront quei bi temps empren el d'enconuschar la giuvna Ursulina Sgier da Tersnaus la quala el marida igl onn 1963.

Ina nova piazza da lavur giavina il Sep cun sia dunna a Sedrun nua ch'els vegnan a passentar ensemble l'entira veta futura. La famiglia crescha spert. Treis feglias ed in fegl portan bia ravugl, legria e satisfaciun en famiglia. 1971 retscheiva la famiglia Widera il gia daditg desiderau dretg sco burgheis dalla vischernaunca da Tujetsch. Pil Sep ina honur, era el in um che saveva appreziar d'astgar esser integraus ella societat.

1972 cumpra la giuvna famiglia la garasca Oberalp odem il vitg Sedrun. In temps che pretenda lavur, spagnar e setener ensemble. Quei han il Sep e l'Ursulina praticau

l'entira veta. Surviu lur clientella luverdis e dumengias, mo era astgau passentar ensem en qual biala ura cun lur bus da camping el Tessin. Il temps varga spert ed ils affons stattan in suenter l'auter sin atgnas combas ed en buca ditg fan ils biadis viseta tier il losch tat Widera. Cun 64 onns fa il Sep plans da surdar la fartschenta a siu fegl che lavura dapi entgins onns cun el en garascha. Ussa spera el da saver prender in tec pli lev e forsa era saver guder pli stedi siu preferiu hoby silla piazza da campar. Denton la veglia da Diu ei stada in'autra. Baul gl'atun digl onn vargau ha ina nauscha malsogna fatg valer e destruiu tuts plans e tutta speranza sin megliurament. Ils 20 da settember ha Niessegner deliberau il Sep da sias dolurs el spital cantunal a Cuera.

Car tat Widera, che Ti eis vegnius prius si sco Tujetschin en Tia secunda patria, han biars indigens demussau accumpignond Tei al davos viadi terrester en santeri. Tiu caracter sensibel havess sponz entginas larmas, havesses Tiu viu ei culs agens eglis.

Tes cars, parents ed amitgs, nus tuts lein tener Tei en buna memoria

Ruaussa en pasch

Tiu schiender, Claudi Monn